

# Dumane, Chi Serà ?

Vi cantu queste parolle  
A voi, figlioli è figliole,  
Chì vi fermi qualchì scritturu  
Quande lu mio core serà zittu ;  
Si sò rotte le mio bracce  
Per tè, zitellu chì nasce,  
Per chì u filu d'u mio versu  
T'alzi un altru universu.

Ripigliu:

Dumane, chì serà  
A sorte di l'Umanità ?  
Trà l'amore è le guerre,  
Trà rancore, allegria è preghere ;  
Quale hè chì tesserà  
U filu di realtà,  
Nascieranu quest'ore  
Duve pianterà infine lu dolore ?

Si sò siccate e mio penne  
Per tè, omu di l'avvene,  
Scrivenduti 'sse sperenze  
Carche d'amore è di tulerenze.  
T'avemu tesu la manu  
A tè, figliu di l'Umanu,  
Per accendeti lu chjassu,  
E per guidà lu to passu...

Ripigliu:

Dumane, chì serà  
A sorte di l'Umanità ?  
Trà l'amore è le guerre,  
Trà rancore, allegria è preghere ;  
Chì fiara brusgerà  
I candeli di l'eternità,

Di 'ssu mondu indecisu,  
Di 'ssa Terra, cosa ne serà lu visu ?

D'aria pura serà,  
O di radio-attività ?  
Nucleare o vita,  
Unu solu puderà vince a partita.  
A sorte v'apartene  
Solu à voi, omi di l'avvene,  
Ma di nanzu d'andà,  
Prumettetemi chì a vita vincerà...